

menta. Nam qui ex hoc ordine vel aulam, vel militiam, vel ruri vitam œconomicam sectantur; etsi naturalem Logicam sibi sentiunt commodissimam; eo tamen vix adigi poterunt, ut hujus Disciplinæ quærant præceptores.

II. Eruditos vero Politicos jam agnoscimus, si quatuor Academiarum Facultates intueamur. Isti enim sunt, qui ex altera Classe moralibus & politicis principiis imbuti, ad Leges civiles, & negotia judiciorum & consultationum descendunt. Et ad eos quoque Doctores ablegantur, qui generis nobilitatem literis commendatam esse cupiunt.

III. Equidem in Academiis distinctos habemus Præceptores, unde proficiant Theologi, Jcti, Medici, quin et Philosophi. Sed ea diversitas si prorsus observari non potest in Scholis & Gymnasiis, omnino tamen requiritur à Præceptoribus, ut cognito cujuslibet studio, nec nimium cuivis exhibeant nec parum. Aliter ponenda sunt fundamenta templorum, aliter curiarum: inde quis neget, aliâ doctrinâ excitandos esse homines, templo vel curiæ profuturos. Sic enim Præceptores Academici tanto minus conqverentur, rudes & incultos auditores suis Lectionibus fuisse obtrusos.

IV. Equidem ipsorum Politicorum in vitâ communi non levis est diversitas. Nonnulli enim id solum agunt, ut publicis sufficiant negotiis: alii vicissim eâ simul pollere volunt dexteritate, ut, quod in praxi feliciter præstant, docere queant cæteros. Quin autem istos deceat major Logices notitiâ, dubium est nullum.

V. Interim si nemo certus est, quantum valeat intelligendo, quamdiu nescit, quantum valeat docendo: fortè optandum esset, omnes in docendi hâc facultate paululum confirmari. Nisi enim ad aliquem spectare potest informatio directa, ut auditores passim confluentes ab eo velint fieri doctiores; præstari tamen id solet indirectè, cum in disputatione, in conversatione in solenni consultatione sententia proposita vult explicari. Nam sic in judiciis quoque sæpius appellare solemus à Judice minus informato, ad melius informandum.

VI. Quicquid autem hujus sit, videamus potius, quæ studia præ cæteris occupare Politicum debeant, ut exinde, quas partes

tes